

Da poi disnar, fo Pregadi et leto queste letere soprascrite.

Di Sibinico, di sier Andrea Donado conte et capitano vene letere, di 7, con l'aviso di la incursion fata per turchi su quel di Segna, fato gran preda di anime 800, et amazato il fiol dil ban fino appresso la terra, brusato tre castelli e fato gran danno. Scrive quel ban dil re di Hongaria è a Richach, zornate tre di Sibinico con zente, à mandato schiopetieri 150 in Dalmatia, *videlicet* 50 a Clisa, 100 a Scardona; e altre particolarità.

Fu posto, per li Savii, atento sier Marco da Pexaro qu. sier Caroso è stato assai a servir la Signoria nostra proveditor a Cival di Friul, e insta aver licentia, ch'el sia electo *de præsenti*, per eletion di la banca et 4 man di eletion, uno proveditor in suo locho con ducati 25 neti al meze per spese, *ut in parte*. Et fu presa: 7 di no, 156 di sì, et fo fato eletion. Rimase sier Fantin Lippomano, el XL criminal, qu. sier Zuanne. Il scurlinio scriverò di soto.

Fu posto, per sier Zacaria Dolfin savio dil Consejo, atento la Signoria dia aver dal ducha di Ferara ducati 23 milia et dal marchese di Mantova ducati 13 milia, che per Colegio sia mandato uno secretario a dimandar questi tal danari, *ut in parte*. A l'incontro, tuti li Savii messeno de indusiar *pro nunc*, atento non sia tempo di dimandarli. Parlò, per la sua opinion, dito sier Zacaria Dolfin; li rispose sier Antonio Grimani procurator. Andò le parte: 30 dil Dolfin, 150 di Savii, e fo preso l'indusia, et fo comandà credenza atento importa il taser.

30 Fu posto, per sier Bernardo Barbarigo consier, tutti i savii, atento è do galie candiote a Corfù con il provedador di l'armada, qual è stato mesi... fuora, che sia scritto al dito proveditor: che volendo essi sopracomiti et zurne restar fuora per altri 6 mexi, se li darà una sovention che potranno star, et se li manda ducati 600 di tornesi, che volendo dagi ducati 300 per galia et vengino in Histria, dove si manderà do galie di l'arsenal a incambiar quelle, et si manderà *etiam* la sovention, *ut in parte*; et fu presa. Et non volendo, le mandino in Candia a disarmar con li danari per armar di le altre: 38 di no, 146 de sì.

Fu posto, per li Consieri, atento li meriti di Stamat dil Zante, qual è bandizato dil Zante per homicidio fato de li et si à ben portato in queste guerre con sier Tomà Moro capitano al Golfo, che li sia fato salvoconduto per 100 anni. Et fu preso: 2, 23 et 119.

Fu posto, per li Savii, dar una galia è in l'Arse-

nal, di le vechie, a li Marconi, quali loro la voleno far conzar e usarla al viazo di pelegrini al Zaffo, con questo, nel ritorno sia stimà il danno di ditta galia et siano ubligati di satisfar la Signoria nostra, *ut in parte*.

Eletion di provedador a Cival di Friul con ducati 25 al meze per spese, juxta la parte.

Sier Nicolò Donado, el XL criminal, de	
sier Andrea	89. 88
Sier Christofal Gabriel qu. sier Silvestro, fo a la castelania di Treviso	20.145
Sier Leonardo Zantani, el XL criminal, qu. sier Antonio	85. 94
Sier Zuan Dolfin, fo proveditor a Feltrè, qu. sier Hironimo	60.112
Sier Zuan Francesco Marzelo, el XL criminal, qu. sier Fantin	49.123
Sier Alvixe Griti, fo provedador a Monfalcon al tempo dil confitto, qu. sier Francesco	39.141
Sier Gregorio Pizamano, fo provedador a Citadela, qu. sier Marco	53.127
Sier Francesco Lipomano, fo provedador a Pontevigo, qu. sier Zuanne	73.102
Sier Gabriel Zigogna, el XL zivil, di sier Francesco	37.140
Sier Zusto Guoro, fo di Pregadi, fo a tute le fazion di Padoa, qu. sier Pandolfo	80. 97
Sier Alvise Baffo, el XL criminal, qu. sier Mafio	91. 85
Sier Bernardin Emo el cavalier, qu. sier Piero	69.108
Sier Leonardo Bembo, fo XL zivil, è a la custodia di Treviso, qu. sier Francesco	39.137
Sier Piero Gradenigo, fo a la doana di mar, de sier Gabriel	53.122
Sier Urban Bolani, el XL criminal, qu. sier Alexandro	55.120
Sier Zuan Malipiero fo a la zecha di l'oro, di sier Hironimo	42.125
Sier Zuanne Francesco Badoer, fo zudexe di petition, qu. sier Giacomo, qu. sier Sebastian cavalier	77. 94
— Sier Fantin Lipomano, el XL criminal, qu. sier Zuanne	98. 79
— Sier Antonio Michiel, fo proveditor a Pordenon, qu. sier Piero	98. 77